



Një preparat largoi sorrat nga Gjakova

## Pas dyzet vjetësh, zhduken sorrat nga Gjakova

Është arritur një marrëveshje me kryetarin e komunës që kjo punë në fillim të bëhet pa pagesë dhe nëse ka sukses atëherë do të bisedohet për mirëmbajtjen e parkut në të ardhmen

Arta Z. Harraqia

**GJAKOVË** → Një grup të rinjsh që me kompaninë e tyre "Truly Nolen", bëjnë dezifentimin dhe dezinsektimin e ambienteve të ndryshme, këto ditë kanë bërë diçka që në Gjakovë nuk ka mundur ta bëjë askush në dyzet vjetët e kaluara. Me anë të një preparati të quajtur "Fog", Ngadhënjimi, Besforti, Albani e disa djem të tjerë nga kjo kompani kanë arritur të largojnë sorrat nga parku i qytetit, të cilat për shkak të ndyrësisë së tyre, për shumë vit me radhë kanë pamundësuar qëndrimin e madje edhe kalimin nëpër këtë zonë të qytetit.

"Si tregojnë edhe më të vjetrit, ky vend gjithnjë ka vuajtur nga qindra mijëra sorra, që gjatë tërë kohës e kanë bërë të pamundur lëvizjen nëpër këtë pjesë të qytetit. Tregohet se shumë herë është tentuar të bëhet eliminimi i tyre, duke përdorur madje edhe armët e gjahut,

zhurmat e sirenat e ndryshme, por asnjëherë nuk është arriut që të ketë ndonjë sukses", ka thënë Ngadhënjim Bicurri, përfaqësues i kësaj kompanie në Gjakovë. Sipas Bicurrit, puna për eliminimin e tërësishëm ka filluar tash e një javë, ndërsa rezultatet kanë qenë befusuese edhe për vetë ata. "Para shtatë ditësh kemi filluar të spërkasim pemët në park dhe të gjitha ndërtesat përreth

parkut, të cilat kanë qenë vend akomodimi për sorrat. Rezultatet e këtij preparati pritet të kenë efekt pas dhjetë ditësh, mirëpo kur ka kaluar vetëm një javë mund të them se është arriut suksesi maksimal", tregon ai.

Ndërkojë, i tërë ky aksion po zhvillohet në baza vullnëtare dhe pa ndonjë shpërblim. "Në fillim nuk na kanë besuar se mund ta arrijmë një gjë të tillë dhe nuk na kanë përkrahur shumë. Mirëpo, ne kemi arritur një marrëveshje me kryetarin e

komunës, që këtë ta bëjmë pa pagesë dhe nëse kjo ka sukses atëherë do të ulemi e të bisedojmë për mirëmbajtjen e parkut në të ardhmen", ka thënë Alban Gunga, një tjetër përfaqësues i kësaj kompanie.

Ndryshe, eliminimi i sorrateve, është mirëpritur edhe nga qytetarët, të cilët këto ditë po ndjehen më të lirë të rrinë dhe të shëtisin në parkun e qytetit. "Nuk ka ndodhur ndonjëherë të kalojë këtejpari e të mos glacitëmi nga sorrat. Me to Gjakova ka hequr shumë dhe largimi i tyre është diçka që duhet përshtendetur. Tash po irri i qetë në këtë park së bashku me miqtë e mi", thotë pensionisti Muhamet Kulludra.

Përfaqësuesit e kompanisë "Truly Nolen", thonë se spërkatja e ambientit do të vazhdojë edhe për tre-katër ditë ndërsa garantojnë se zgjidhja e këtij problemi do të jetë i përhershëm dhe më nuk do të ketë rikthim të sorrave në parkun e qytetit.



Përfaqësuesit e kompanisë "Truly Nolen", thonë se spërkatja e ambientit do të vazhdojë edhe për tre-katër ditë ndërsa garantojnë se zgjidhja e këtij problemi do të jetë i përhershëm.